



uMzinyathi
District Municipality



NEWS

UMZINYATHI DISTRICT
MUNICIPALITY
QUARTERLY EDITION 2022

OKUQUKETHWE

Baphume bakhekile abesifazane kugujwa usuku lwe-Women's Day eMzinyathi.....	pg3
Ikhosomba leMeya: Ald Petros Ngubane.....	pg4
Siyaziqhenya ngabesifazane baseNgome, eMvoti	pg5
IMeya U-Ald Ngubane Uhalalisele Abesifazane Abazimele.....	pg6
OwaseMzinyathi uqophe umlando ebuya nendondo kowama-Commonwealth Games	pg7
Ibanjwe ngelikhulu isasasa imidlalo ye-District Golden Games Selections.....	pg8



uMzinyathi
District Municipality

BAPHUME BAKHEKILE ABESIFAZANE KUGUJWA USUKU LWE-WOMEN'S DAY EMZINYATHI

Lo mgubho wosuku lwabesifazane ubuhlelwe uMasipala wesiFunda uMzinyathi ngokubambisa nenhlangano engenzi nzuzo evikela ubukhosi bakaZulu eyaziwa ngeNdonsa yeSizwe.

UNdlunkulu weSizwe uNtokozo uKaMayisela Zulu obeyisikhulumi sosuku kulo mgubho utshele abantu besifazane ukuthi bayeke ukudonsela phansi ngokukhulumana kabi kodwa bafukulane ngezinto ezizobathuthukisa.

“Singabantu besifazane masiyeke ukwahlulelana nokupendana ngezinto ezimbi. Sonke njengoba sifake ama-make up kunezinto ezinzima esizithwele, abanye bethu baze besabe nokuxoxa ngazo ngoba siyahlelana. Siyimbokodo sinamandla ake sizifundise ukuthandana nokubambana. Siphinde sizifundise ukuxolela uma kukhona abasonile ngoba akuxolela akusizi okonile kodwa kusiza wena,” kubeka uNdlunkulu.

U-Adv Zandile Mshololo wodumo lwecala likanozinti we-Orlando Pirates utshele abesifazane ngokubaluleka kwemfundo. “Imfundo iyisikhali esizonqoba ngaso ingcindezelo singomama nokuhlukunyezwa. Imfundo iyasisiza sikwazi ukuthatha izinqumo eziphusile,” kusho u-Adv Mshololo. Uphinde weluleka abesifazane

ngokubaluleka ngokukhetha uhlobo lomshado elungeke lubanike inkinga uma kwenzeka umshado uphela, ukubaluleka kwencwadi yefa (will) nokunye okuningi.

UMntwana Mukelile Zulu ukhuthaze abesifazane abasebancane ngokubaluleka kokuziphatha bazigcine. IMeya yesiFunda uMzinyathi Ald Petros Ngubane ukhumbuze abesifazane ngokubaluleka kwabo esizweni.

“Siyanithanda bantu besifazane niyasinakekela laba abahlukumeza abantu besifazane mabawuyeke lo mkhuba omubi kangaka. SiwuMasipala sigqugquzela abesifazane ukuba benze imifelandawonye bazisebenze. Ondlunkulu bamakhosi nabo bebodwa benze imifelandawonye ezothuthukisa izizwe zabo belandela ezimfundisweni zabesifazane abenza umehluko esizweni okubalwa uNdlunkulu Mthaniya, Ndlunkulu Nandi, Ndlunkulu Magogo,” Ndlunkulu Thomolozile, Ndlunkulu Mantfombi nabanye abaningi.

USolwazi Musa Xulu weNdonsa yesizwe unxuse ukuthi kube neZulu monument kungaphezi ukuqhakambiswa kwezinto ezenziwa ngabesifazane bakaZulu ukugqugquzela nabanye besifazane ukhamba ezinyathelweni zabo.



UNdlunkulu weSizwe uNtokozo uKaMayisela Zulu obeyisikhulumi sosuku kulo mgubho.

IKHOSOMBA LEMEYA: ALD PETROS NGUBANE



Thuthuka Mzinyathi! Lokhu esizbekele khona kuveza ngokugcwelel ukuthi yini esihlose ukuyifeza kuMasipala wesiFunda uMzinyathi.

Inhloso noma izinhloso zethu ukuhola uhlelo lokuthuthukisa zonke izingxenye zoMzinyathi ngokuthuthukisa ingqalasizinda yethu nokusebenza kwezimali kanye nokuhlinzeka izidingo zabantu okuzonyusa ukusimama komnotho nenhlalo.

Ngempumelelo sikwazile ukwenza izinhlelo zokuthuthukisa ingqalasizinda yethu yamanzi. Sishintshe amapayipi amadala ethusi safaka awe-plastic. Amapayipi e-plastic awathombi futhi awagugyi phansi kalula.

Ukwakhiwa kwesiphehli samanzi esingamalitha angu-1,25 Mega Litre, sekuqalile endaweni yaseMashunka futhi kuzodaleka amathuba emisebenzi esikhashana

endaweni. Le ngqalasizinda yamanzi ka-R 45,7 million ingenkulukazi kulawo adonsa amanzi emfuleni iSampofu River.

Emzamweni wokubhekana nokuntuleka kwemisebenzi nobuphofu esiFundeni, siqale uhlelo lokuhlinzeka intsha ngamathuba emisebenzi, eNquthu, Ndumeni, Msinga nakuMasipala waseMvoti lapho siqasha intsha ngohlelo lwe-EPWP.

Sesiphumelele ukwenza lokhu okulandelayo uma kuziwa kwezokuqashwa kwentsha ngohlelo lwe-EPWP.

- Uhlelo lokuqashwa luqalile kuMasipala waseNdumeni.
- Uhlelo lokuqashwa luqalile kuMasipala waseNquthu noMsinga.
- Uhlelo lokuqashwa luqalile kuMasipala waseMvoti.

Siphinde sakwazi ukusingatha uMjaho wamaHhashi i-Dundee July 2022, emva kwezingqinamba ebezingalindelekile ezifike nobhubhane lweCovid, nokukudale ukuthi umjaho ungabi khona. I-Dundee July isihambe ibanga elide kusukela yasungulwa ngonyaka ka-2006, futhi uhulumeni usedlale indima enkulu ekuthuthukiseni umjaho ukuze ube kuleli zinga esilibonayo namuhla. Kuletha injabulo enkulu kimi ukusho ukuthi umjaho ube yimpumelelo enkulu kanti ibenomthelela omuhle emnothweni wamabhizinisi amaningi nabaphathi bamabhizinisi emikhakheni eyahlukene. Ngifuna ukubonga izihlaka zendawo, abahlali nezivakashi ngokwenza lo nyaka ube yimpumelelo.

Ngifisa ukuphinde ngibonge amaKhansela nabasebenzi ngokuqhubeka nokusebenza ngokuzikhandla ekusebenzeleni abantu baseMzinyathi. Esikuzuzile kulesikhashana kukhombisa ukuthi asigcini icala kodwa sifeza izethembiso esazenza kubantu baseMzinyathi. Singu hulumeni osemsebenzini futhi abantu baseMzinyathi bangaqhubeka nokubekla amathemba abo kuthina. Thuthuka Mzinyathi!



VISION
A DYNAMIC, AND VIABLE
DISTRICT THAT PROMOTES
GOOD GOVERNANCE,
INTERGRATED AND
SUSTAINABLE DEVELOPMENT



SIYAZIQHENYA NGABESIFAZANE BASENGOME, EMVOTI



iMeya kaMasipala wesiFunda uMzinyathi uAld PMS Ngubane ihlabekile umxhwele ngempumelelo yabesifazane baseNgome eMsinga abafundiswe yilo Masipala imisebenzi yezandla ngaphansi kohlelo lwe-Extended Public Works Programme.

Laba besifazane beSiyazama Co-Operative abafundiswe umsebenzi wezandla uMasipala bakha izimbenge, izinto zokuhlobisa besebenzisa ugesi, baphinde bakhe namacansi namavovo ngencema bathi bayowokukhohlwa befule uMasipala wesiFunda uMzinyathi obavule amehlo wabafundisa ukuziphilisa baze bathenga izimoto.

“Sifundiswe singazi lutho sihleli emakhaya umasipala wasinikeza abantu abafika abazosiqeqesha kulo msebenzi izinyanga ezintathu. Sase siqhubeka nokusebenza njengoba besinenkontileka yonyaka. Siholelwa imali yokuthi sikwazi

ukuthenga insipho. Kuphele unyaka sesinomsebenzi omningi esiwenzile saqala sadayisa. Sithe sisazidayisela nje uMasipala wasibizela kolunye uqeqesho lokonga imali olwasivula amehlo kakhulu saqala sadlala umholiswano we-R1000 nabanye omama imali esayithola lapho sabona ukuthi akuseyona yokuthenga isishebo sayibhinca saqhubeka kwathi kuphela iminyaka emibili ngathenga iveni eselilayisha izingane zesikole. Ngaqasha umfana olishayelayo,” kusho uNkk Ntombifuthi Ngubane.

UNkk Nobuhle Kweyama uthi yena esekwazi ukufundisa izingane ezintathu zagqoka amajazi eNyuvesi elekelelana nobaba wekhaya obekuthi uma ubaba wekhaya empintshekile akwazi ukulelela ngemali.

“Abanye bethu bakhile imizi ngale mali konke lokhu esikwenzayo ebesingekile sikwazi ukukwenza ukube uMzinyathi awusinikanga lamasu okuphila,” esho uNkk Kweyama.

iMeya uNgubane uthi kumthokozisa kakhulu lokhu okwenziwe yilaba besifazane abathe uma benikwa ithuba lokuziphilisa bagijima nalo bangabe besabheka emuva. “Siyaziqhenya kakhulu ngabo. Laba bafunde ngo-2019 kodwa sebebala izinto ezinkulu abazenzile okuyinto esijabulisa kakhulu ukuthi bafunde ukuzenzele bangabheki ukuphiwa izijumbane zokudla. Laba besifazane sebebuya naseGoli ukuyokhangisa umsebenzi wabo okuyinto abebengacabangi ukuthi iyoke ibehlele behleli la emakhaya. Nabanye abaqeqeshiwe nesisabaqeqesha abasike iphethini kulaba besifazane. Uqeqesho oluqhubekayo njengamanje elokufundisa intsha i-security sibafundisa kuwo wonke ama-Grade ne-Fire arm. Abanye bafundiswa umsebenzi wepulangwe nokunye okuningi,” kusho iMeya.



IMEYA U-ALD NGUBANE UHALALISELE ABESIFAZANE ABAZIMELE

IMeya kaMasipala wesiFunda uMzinyathi ivale Inyanga yabesifazane ngokuhlalisele bonke abesifazane abenze umehluko empilweni yabo emuva kokuba benikwe ithuba lokufunda wuMasipala bagijima nalo bangabe besabheka emuva.

Lababesifazane basePomeroy abebefunda ngaphansi kohlelo lwe-EPWP ngo-2020 befundiswa ukuthunga kuthe uma kuphela inkontileka yabo emuva konyaka bafuna indawo yokusebenza khona ePomeroy. Kumanje bathungela izikole zasendaweni umfaniswano wesikole okuyi-Ntokozweni Primary neNtli Primary.

UNkk Phumelele Kunene ubonge uMasipala

uMzinyathi ngokubanika isinkwa. "Nathi emndenini yethu sesikwazi ukubeka isinkwa etafuleni ngenxa kaMasipala waseMzinyathi. Abantu abathungela imicimbi bayeza la sibathungele bagqoke babe bahle, sithunga umfaniswano wamabandla, wezikole ngisho amajazi alabo abathweswa iziqu siyawakhipha," esho.

Omunye wabo uNkk Bongiwe Gabela uthi sebeke babizwa nawuMasipala waseMsinga ongaphansi koMzinyathi mhlaka 09 June kulo nyaka ukuba bazokhangisa ngomsebenzi wabo kwi-Fashion Show.

"Amakilayenti amaningi siwathola kulowo mcimbi njengoba sesihlala simatasa zonke izinsuku,"

kubeka uNkk Gabela.

IMeya kaMasipala wesiFunda uMzinyathi u-Ald PMS Ngubane ebahlalisele uthi sengathi nabanye abaqeqeshelwe amakhono ehlukeni wumasipala bangasika iphethini kulaba besifazane.

"Sifisa abesifazane bafunde ukuzakha nokuzenzela bangathembeli kwabesilisa ngoba bagcina seabahlukumeza ngoba bazi ukuthi bancike kubo kabakwazi kuzenzela lutho. Uqeqesho luyaqhubeka esikhathi esingekakanani sizobe sihlalisele abanye abafundiswe yilo masipala izincwadi zokushayela, nabafundiswe i-security," kusho uAld Ngubane.



uMzinyathi
District Municipality

MISSION

WE ARE A UNITED FAMILY OF MUNICIPALITIES THAT CHAMPIONS SERVICE DELIVERY THROUGH CO-OPERATIVE GOVERNANCE AND PUBLIC PARTICIPATION.



OWASEMZINYATHI UQOPHE UMLANDO EBUYA NENDONDO KOWAMA-COMMONWEALTH GAMES

LUMasipala wesiFunda uMzinyathi uswelwe amaphiko okundiza injabulo kunqoba owaseMzinyathi ku-Commonwealth Games abebanjelwe e-England kusuka mhlaka 28 July kuya mhlaka 8 ku-August 2022. UPhiwokuhle Mnguni (20) ongumshayi sibhakela waseSibongile, eDundee usenze saziqhenya eMzinyathi sashayela phezulu ebuya nendondo yethusi kule midlalo ewuchungechunge edumile emhlabeni wonke jikelele.

UMhlonishwa iMeya Ald Petros Ngubane uthe siyaziqhenya kakhulu ngoPhiwokuhle kanye noMqeqeshi wakhe uMnu Nathi Hlatshwayo obehambe naye ukuyomela iNingizimu Afrika naye ongowaseDundee nezinsizwa ezimbili zase-Eastern Cape.

“Sithokoze kakhulu ngempumelelo yabo bebuya nezindondo njengoba nalo mfana wase-Eastern Cape sizwile ukuthi uyitholile naye. Impumelelo yabo siyafisa igququzele nabanye abakulo mkhakha nabenza imikhakha eyehlukene bazi ukuthi umuntu angaba noma yini afisa ukuba yiyo okungakhathaleki ukuthi uphuma endaweni enjani. Umdlalo wesibhakela usenze sawola ingqwaba yezindondo namanje sisaqhubeka nokuhlalana ngisho sesiqhathwe nabantu bomhlaba jikelele.

Siyambongela kakhulu ke uPhiwokuhle ngempumelelo yakhe sibongele nomndeni wakhe. UPhiwokuhle noMqeqeshi wakhe njengoba bebuya ngehora leshumi bazokwemukelwe nguSekela Meyu uNkk

Happiness Mchunu esikhumulweni sezindiza i-King Shaka International Airport lapho bezoba nesidlo setiye ngaphambi kokuba bafika lapha eMzinyathi sibe nesidlo sedina nabo ukubahalalisela,” kusho iMeya.

UPhiwokuhle uthi uwine ngenxa yokusebenza kwakhe kanzima ezikhandla ejimini. Uthi yize benenselelo yezinto zokujima eziseqophelweni eliphezulu kodwa kumthokozisile ukuwukhombisa umhlaba ukuthi naseNingizimu Afrika akhona amabhokisa.

UPhiwokuhle uwine nje kulemidlalo yama-Commonwealth Games ubesevele ewuqophile umlando njengoba eyibhokisa lokuqala lesifazane ukuba liqokelwe kule midlalo.



UMhlonishwa iMeya uAld Petros Ngubane, kanye noPhiwokuhle Mnguni umqeqeshi wakhe uMnu Nathi Hlatshwayo kanye mama kaPhiwokuhle uNksz Lindokuhle Mnguni.

IBANJWE NGELIKHULU ISASASA IMIDLALO YE-DISTRICT GOLDEN GAMES SELECTIONS

Imidlalo yezaguga ebizwa ye-District Golden Games Selections ibanjwe ngenkulu impumelelo kuMasipala wase Mvoti.

Lemidlalo ingolunye lwezinhlelo zoMnyango weZemidlalo ngokubambisana nomasipala ukukhuthaza ukuzivocavoca kubantu abadala balwe nezifo

emzimbeni ngenxa yokukhula kweminyaka.

Abaphumelele kulesigaba bazo qhubekela phambili kwimidlalo yokucina yesiFunda lapho kuzobe kuqhudelana bonke abaphumelele koMasipala abangaphansi koMzinyathi.



IZINOMBOLO EZIBALULEKILE

UMZINYATHI DISTRICT MUNICIPALITY

Tel: 034 219 1500

Email: rc3@umzinyathi.gov.za

UMVOTI LOCAL MUNICIPALITY

Tel: 033 413 9100

Email: info@umvoti.gov.za

MSINGA LOCAL MUNICIPALITY

Tel: 033 4930 760/1/2/3/4

Email: info@umsinga.gov.za

NQUTHU LOCAL MUNICIPALITY

Tel: 034 271 6100

Email: siyabongas@nquthu.gov.za

ENDUMENI LOCAL MUNICIPALITY

Tel: 034 212 2121

Email: registry@endumeni.gov.za